

2. november 2003

UKA 2003/164

**Inatsisartut Naalakkersuisullu pillugit**  
**Inatsisartut inatsisaata allanngortinneqarneranik**  
**Inatsisartut inatsisissaattut siunnersuut**  
*(Naalakkersuisut siulittaasuata saniatigut naalakkersuisunut ilaasortat*  
*arfineq-marluusinnaanerat kiisalu aningaasanut inatsisip akuerineqartarneranut*  
*killiliussaq pillugu kingunerisatut iluarsiiissut)*

**pillugu**

**Inatsisartut Inatsisit Atortinneqarnerannut Ataatsimiititaliaata**

**ISUMALIUTISSIISSUTAA**

**siunnersuutip aappassaaneerreqarnerani saqqumiunneqartoq**

Inatsisartut Inatsisit Atortinneqarnerannut Ataatsimiititaliaat suliarinninnermini ukuninnga inuttaqarpoq:

Inatsisartuni ilaasortaq Ane Hansen, Inuit Ataqaatigiit, siulittaasoq  
Inatsisartuni ilaasortaq Isak Davidsen, Siumut, siulittaasup tullia  
Inatsisartuni ilaasortaq Enos Lyberth, Siumut  
Inatsisartuni ilaasortaq Otto Jeremiassen, Atassut  
Inatsisartuni ilaasortaq Marie Fleischer, Demokraatit

Inatsisartut Inatsisit Atortinneqarnerannut Ataatsimiititaliaata siunnersuut siullermeerneqareermat misissuataarpaa.

Inatsisit Atortinneqarnerannut Ataatsimiititaliap malugniarpaa siunnersuut marlunnik immikkoortortaartoq.

Aningaasanut inatsimmik Inatsisartut akuersissutiginnittarnerannut killiliussamik allanngortitsineq kingunerisatut iluarsiiissutaavoq, Inatsisartut inatsisaannik Namminersornerullutik Oqartussat missingersuutaat pillugit Inatsisartut

inatsisaannut, Inatsisartut inatsisaatigut nr. 1, 23. maj 2000-imeersukkut allanngortinneqartumut, naapertuuttunngortitsisoq. Tassunga Inatsisit Atortinneqarnerannut Ataatsimiititaliaq oqaaseqarfiginnissutissaqanngilaq.

Tamatuma saniatigut siunnersuummi pineqarpoq Naalakkersuisuni ilaasortat amerlassusissaattut qummut killigitinneqartup qaffanneqarnissaa. Taamaalilluni Naalakkersuisut, Naalakkersuisunut Siulittaasup saniatigut, Naalakkersuisuni ilaasortanik marlunniit arfineq-marluk tikillugit (siusinnerusukkut marlunniit arfinillit tikillugit) amerlassuseqalersinnaassapput.

Inatsisit Atortinneqarnerannut Ataatsimiititaliami amerlanerussuteqartut Siumumeersut Inuit Ataqtigiiinneersullu tamatumunnga ima oqaaseqarniarput:

Naalakkersuisuni ilaasortat amerlassusiisa killiliivigineqarnerat atuuttoq 1988-imi aalajangersarneqarpoq. Piffissap tamatuma kingorna Namminersornerullutik Oqartussanit akisussaaffiit arlalippassuit tiguneqarput. Tamatuma saniatigut Naalakkersuisooqatigiit kissaatigaat naalakkersuisoqarfimmik nutaamik pilersitsisoqassasoq: Namminersorneq pillugu Naalakkersuisoqarfimmik. Tamatuma naalakkersuisuni ilaasortat amerlassutsimikkut ilaneqarnissaat pisariaqalersippaa.

Amerlanerussuteqartut taaneqartut naalakkersuisoqarfimmik nutaamik pilersitsinissaq, tassungalu atatillugu Naalakkersuisut amerlineqarnissaat, taperserpaat. Amerlanerussuteqartut Siumut Inuit Ataqtigiillu maluginiarsimavaat Namminersorneq pillugu Isumalioqatigiissitat paasinninnerat malillugu suliassanik pineqartunik Naalakkersuisut Siulittaasuata naammaginartumik anertussusilimmik kiffaanngissuseqarluni naalakkersuisuni ilaasortat akornanni sapinngisamik tulluarnepaamik agguataarisinnaanera qulakkeerneqartariaqartoq. Taamaammat apequtaalerpoq inatsisartut naalakkersuisullu pillugit Inatsisartut inatsisaanni naalakkersuisuni ilaasortat amerlassusii iluarsiivigissallugit ilumut tulluurtuunersoq. Taamatut iluarsiinissaq pisariaqavissutut isumaqarfiginangilaq, Naalakkersuisuummi Siulittaasuata Naalakkersuisut inuttalorsorneqarnissaannik siunnersuutaa Inatsisartunut taasissutigigitinneqartussaammat, Naalakkersuisullu atuunnerinut aningaasaqarnikkut killissarititaasut aningaasaliissuteqartarnermut inatsisikkut immikkut aalajangersaavigineqartarmata.

Tamanna tunngavigalugu amerlanerussuteqartut allannguutissatut siunnersuummik naalakkersuisuni ilaasortat amerlassusissaannik aalajangersakkap inatsisartut inatsisaannit peerneqarneranik kinguneqartussamik saqqummiussipput.

Inatsisit Atortinneqarnerannut Ataatsimiititaliami ikinnerussuteqartut Atassummeersut Demokraatineersullu isumaqarput tunngavissatut saqqummiunneqartoq tunngavigalugu Naalakkersuisut amerlineqarnissaannut tunngavissaqanngitsoq.

Ikinnerussuteqartut erseqqissarusuppaat namminersulernissaq ikinnerussuteqartut *akerlerinngimmassuk*. Pingaartuuvorli akisussaaffinnik nutaanik tigusinissatsinnut

piareersimalertinnata nuki-ngiussinnginnissarput. Tamakkiisumik namminersulissagaanni imminnut aningaasaqarnikkut napatissinnaasariaqarpoq - taamaaliunnngikkuttami innuttat ilaasa sanngiinnerpaamik inissisimasut atugarissaarnissaat sapangittussaagatsigu. Taamaattumik pingaartuuvoq namminersulernissap eqqunneqarnissaanut tunngavissat - tamatumalu nassatarisassaasa - tamakkiisumik qulaajaavigineqarsimanissaat. Ikinnerussuteqartuttaaq pingaartippaat aalajangiinissaq taama pingaaruteqartigisoq innuttat qulaatiinnarlugit pissanngitsoq.

Suliassalli namminersulernissamik suliap ingerlasup akisussaassuseqartumik ingerlaqqinnissaanut attuumassuteqartut Naalakkersuisut amerlinngikkaluarlugit ingerlanneqarsinnaalluarput. Ingerlatsiviit Naalakkersuisut Siulittaasuata naalakkersuisoqarfimmut nutaamut inissikkusutai Naalakkersuisut Siulittaasuata, maannakkut taamaallaat tassaasut Naalakkersuisut Allattoqarfiat Aqutsinermullu Pisorta qarfik, oqartussaaffiisa ataannut ajornaquteqanngitsumik inissinneqarsinnaapput.

Naalakkersuisoqarfimmik nutaamik pilersitsineq allaffissornikkut aningaasartuutit amerlinerinik kinguneqartussaavoq, tamannalu pisortani aningaasartuutigineqartartut ikilileriffigineqarnissaannik pisariaqartitsinermik oqaluttarnermut naapertuuttuunani.

Taamaammat ikinnerussuteqartut inerniliussatuarisinnaasaat tassaavoq, naalakkersuisooqatigiinni assigiinngitsunik isumallit tamakkerlugit naammaginartunik amerlassusilinnik naalakkersuisutut inissanik pissarsisinneqarnissamik kissaateqarnerat Naalakkersuisut siunnersuutaannut tunngavioqarpoq. Ikinnerussuteqartut isumaqarput innuttaasut tamatumunnga akiliisuutissallugit pissutissaqanngitsoq.

Taamaammat ikinnerussuteqartut siunnersuut itigartinneqassasoq inassutigaat.

-

**Taamatut oqaaseqarluni Inatsisit Atortinneqarnerannut Ataatsimiititaliap siunnersuut aappassaaniigassanngortippaa.**

Ane Hansen  
Inuit Ataqatigiit,  
Formand

Isak Davidsen  
Siumut

Enos Lyberth  
Siumut

Otto Jeremiasen  
Atassut

Marie Fleischer  
Demokraterne